

Parare Domino Plebem Perfectam

A lokisetse Morena Sechaba se phethehileng (Luka 1,17)

Moeletsi oa Basotho

www.moeletsiobasotho.co.ls

Matona a tšepisa pulo ea lifeme



5

2030 re hloka ho keteka -Majara

6



Flour Mills e khahlametsa Basotho

7



3

SECHABA SE ITŠETLA KA 1MILLIONE

20 YEARS
1824-2024
BASOTHO

KETEKELO EA LILEMO TSE MAKHOLO A MABELI SECHABA SA BASOTHO SE THEHILOE

MOELETSI

LCCI e fetola maoa

Ea bosiu e patoa ka lebota



Nthabeleng Seithleko

Mokhatlo oa Bahoebi Lesotho (LCCI) o tla ka leoa le lecha la ho itšematlela le ho batla lithuso hore o tsebe ho ntlafatsa litšebeliso le khoebo. Tsena li boletsoe ke Mulla-Setulo oa Mokhatlo, Fako Hakane, puisanong le koranta ka la 9 'Mesa monongoaha.

O re mosebetsi o moholo oa mokhatlo oa habo ke ho thusa bahoebi ho fumana mangolo a ho tsamaisa likhoebo mafapheng a fapakaneng a 'muso, 'me ka lebaka la ho hula ka thata mokhatlo o ikelelitse ho tla ka maoa a macha a tla o phelisa ka thoko le ho itšetleha ka liabo tsa bahoebi. O re ba rata ho bona moralo o tataisang bahoebi kahar'a naha e le o arabelang lithoko tsa bona.

A re ba bile le 'moka moo litho tsa mokhatlo li neng li seka-seka moralo o mocha, o reretsoeng ntlafatso ea mokhatlo e le oa boitšematlelo.

Setsebi sa litaba tsa khoebo, 'Mapaseka Nteli, o bontšitse hore leano lena le lecha le tl'o thusa bahoebi ba Lesotho ho kena litabeng tsa khoebo ba sebelisa marang-rang, ho tseba ho hoebisana le machaba ka hore

lipehelo tsohle tsa tšebetso ea bona li lule li le boemong ba machaba le bona ba se salle morao.

O re ho bohlokoa hore bahoebi ba eelloe lipheto tse teng lefatšeng 'me ba imatlafatse, kaha seo se tla etsa hore likhoebo tsa bona li hule ka lithako tsa morao moruong.

O ipilelitse ho bahoebi ho ba le mamello litabeng tsa lipheto hore ba tsebe ho matlafatsa le ho hola khoebong, ba ipapisitse le lipeto.

Rose Ronolt setsebi ho hlaha Naheng ea Canada, o supile hore leano le lokela ho sheba bahoebi ba banyenyane hore ba hole khoebong le ho hoeba ka bolokolohi. A re ba tl'o hloaea leano kahar'a moralo oa mokhatlo ho bona hore ho ba le ntlafatso le lithuso tse tla matlafatsa khoebo. A re ba shebile ha-

hore lisebelisoa hore li ba teng joang ka thoko le ho sebelisa liabo tsa mokhatlo.

E mong oa bahoebi ebile e le setho sa mokhatlo Nkeane Motseki, o itse leha mokhatlo o sitoa ho fihlela lithoko tsa bona, empa ba lumela hore moralo ona oa boitšematlelo hore ba batle lithuso o tla etsa hore ba ntlafale. A re bahoebi ba nyahame kaha ho se phetoho eo ba e bonang, hoo ka linako tse ling ba hlekefetsoang ba ntse ba bona ho se motho ea nkang boikarabello.

O re ba khothaletsa hore mokhatlo o ke o shebe bahoebi bao likhoebo tsa bona li putlameng nakong ea COVID-19 ka mohau, kaha ba bang esale ba oela ka nako eo. O re ha bao ba ka phahama khoebong, mesebetsi e tla ba teng 'me khoebo e tla boela e ba le bophelo.

Maemo a moruo lefatšeng ke a hloabaetsang haholo joale linaheng tseo oa tsona o fokolang o bileng o itšetlelele ka temo ke mathata. Lebaka ke hobane maemo ana a phetoho ea boemo ba leholimo a fetotse ntho e 'ngoe le e 'ngoe. Theko ea lijo e nyolohile ka tsela e hlolang, hoo bang ba reng mafutsana; bana ba kollang ntsi hanong ba tl'o shoella katlung le bana. Lijo-thollo haholo poone e tšoeu e tl'o nyoloha le eona, ka hona Basotho joaloka batho ba phelang ka papa ba tl'o e pata ka boroko. Empa leha ho le joalo, Mookameli oa Leloala le Lehola la Lesotho o entse tšepiso hore le tla khahlametsa Basotho ka 7%. Sechaba sa Basotho ruri se tla thabela ho utloa litaba tse tse monate, kaha ba tla loantšana le lijelello haholo.

Mokhatlo oa Section-2 o so entse kopo-thapeli ho 'muso ho bona hore o khahlametsa sechaba mabapi le nyollo ena ea lithoko tsa lijo. Haufi mona re bone maparamente a potlaka a fetisa molao o neng o sa amane ho hang le sechaba sa Basotho hakaalo. Nako e fihlile joale ea hore re bone a phahamela mapoqo ho thusa sechaba ka tlhoko ea bophelo, ha ba ke ba bontše hore ba feela ba ile moo ho sebeletsa sechaba sena sa Basotho e se ho ithuisa joalokaha ho boleloa.

Ke 'nete hore Mosotho e mong le e mong hona joale o sa tšepetse ho ona 'muso o etsa letsoho la monna, ha e le mona khomo e oele. Re se re thehile tsebe ho utloa 'muso o ntša polelo mabapi le maemo ana a hloabaetsang. Joalokaha o se o ntse o fana ka thuso libakeng tse ling moo pula e setseng borokho sebakeng sa Leribe, Peka. O tsoelepele ho thusa sechaba ho loantša 'muso ona o sa kolotoeng oa mpa. Bahlomphehi ba heso sechaba se le shebile ka tšepo le meokho, ka hona likeleli tsa sona li se ke tsa oela fatše.

Ofisi ea Mohlahlobi oa Libuka tsa 'Muso e ile ea kopana le mafapha ohle a amehang mabapi le lichelete tsa 'muso e le ho etsa moralo kapa ho thusana hore na mokhoa o tšebetso ke ofe. E le ho hloala kapa ho hlahlillana ka malebela mabapi le tšebetso e tsoileng matsoho ebile e na le ponaleto e amanang le lichelete tsa sechaba. Ba ipiletsa ho bahlanka ba 'muso ho etsa mosebetsi o makhetho, hobane lichelete tseo ba li sebelisang ha se tsa bona ke tsa sechaba. E bang ba sa etse joalo ofisi e tla nka likhato tsa molao hobane ho tla be ho tlotsoe molao.

Taba ena ha e ka sebetsoa hantle 'me ea kena tšebetsong ke e 'ngoe e tla thusa ho hloala tšebeliso e mpe ea lichelete. Ho tla bolokoa chelete e ngata e tla thusa sechaba mafapheng a sona ka ho fapakaneng, empa haholo maemong ana ao se tobaneng le ona a nyollo ea lithoko tsa lijo. Ofisi eo e hle e tšoare kathata ho bona hore ho ba le ponaleto licheleteng tsa sechaba, e le hore ha ho se ho hlaotsoe bohlasoa ho thehoe mesebetsi molemong oa bacha. Empa ka holimo ho tsohle ho thusoe ba seng ba qalile likhoebo tsa bona, moketa ho tsosoa o itekang, ho etsa hanyane ha ho tšoaane le ho lula feela.

Lefu la Lefuba le bonahala le hlasetse Naha ea Lesotho hoo lipalo-palo li bontšang ho se phetoho ea letho mabapi le pheko. Litšoaetso tsa lona li ntse li phahama letsatsi le letsatsi, leha ho le joalo Letona la Bophelo le bontša ha lekala le se le nkile mehato ho le loantša. Joaloka ho hloaea litsi tse itseng ho fana ka kalafo e le ho imolla Sepetlele sa Sehopotso sa Mofumahali 'Mamohato. Hape ho na le lingaka tse tlang ho romelloa kahar'a metse ho khahlametsa sechaba, se bonahalang se ntse se le leqe ho hlahlobela. Ba bang ba mahlatsipa ba bontša ha sechaba se ba nena ka lebaka la litlamorao tse bakoang ke lipilisi tseo ba li noang, li ba fetola 'mala oa letlalo hape ba bang ba fokola 'meleng hoo ba qetellang ba sitoa ho tsamaea ba lokela ho peptjoa. Sekhobo sena se ka etsa hore mohla motho a fumanang a e-na le lefu a tšabe ho etsa lihlahlobo.

Contacts: +266 28350 466 / 6260 0983 (Whats app)
Email: moeletsioabasotho@gmail.com



Editorial

Lesoetsa Rakubutu (Editor)
(+266) 58490670 / 62031949
editor@moeletsioabasotho.co.ls

Lehlohonolo Mohale (Sub-editor)
(+266) 58 771 507 / 62 771 507
subeditor@moeletsioabasotho.co.ls

Advertising

Thabo Lesaona
(+266) 28 350 466/ sales@moeletsioabasotho.co.ls

Newsroom

Nthabeleng Seithleko 57 665 038/ 68 216 721
nthabeleng.seithleko@moeletsioabasotho.co.ls

Tšelisio Thakholi (Sports) 58 540 853/ 63 480 404
tseliso.thakhuli@moeletsioabasotho.co.ls

newsroom@moeletsioabasotho.co.ls

Production Desk

'Mateele Liqa, Sr. Canicia Nthunya

Sechaba se itšetla ka 1Millione

Nthabeleng Seitheko

Mookameli oa Ofisi ea More-ro oa Metsi a Lihlaba tsa Lesotho (LHDA), Tente Tente, o re ba fumane hore sechaba sa Ha Mokhathi se jele chelete e neng e le ea koporasi hore e tsebe ho ba phelela nako e telele. Tsena li hlahetse tulong ea Komiti ea Lihloliloeng, LHDA le sechaba se neng se teka lillo tsa sona kapel'a komiti, ka la 11 'Mesa monongoha.

O re chelete eo e ne e le ea lihloliloeng, 'me sechaba se ile sa theha koporasi e le ea morero oa nako e telele, empa se ba makalitseng ke hore kahar'a polokelo ea banka ha ho chelate. O bonts'itse morero o kopile Mookameli oa Sepolesa ho etsa liphuputso mabapi le chelete eo.

O re pelaelo ke hore e nts'itsoe polokelong ea banka ka mekhahlelo e 'meli oa pele e bile M482,000.00 oa bobeli ea eba M879,000.00, 'me ho belaeloa e jeoe ke komiti, ha karolo ea eona e sebelisitsoe ho lefa masole a neng a e katile le basebet-si ba banka.

Litaba tsena li hlahella



tjena kamor'a hore karolo e 'ngoe ea sechaba sa Ha Mokhathi e sa nka karolo cheleteng eo, kaha ba se teng motseng nako eohle. Ka hoo ba re batho ba uneng molemo ke ba lulang ba le teng hae, le hoja ho ntse ho e-na le karolo e 'ngoe e ntseng e unneng molemo.

Ba kopile komiti ho se-etsa litaba tsena hobane bona ke karolo ea sechaba, e hlohang chelete joaloka ba bang.

Har'a litaba tse ling LHDA e tla tšehetsa morero oa sechaba sa Khorong Ha Nchela oa khaho ea Holo, 'me chelete eo se e abet-

soeng ke M608,450.00 e le baamoheli ba bafallisuo.

Ho sa le joalo, sechaba sa Ha Thafeng, se re LHDA e na le lilemo tse 20 e hana ka chelete ea bona ea lintlafatso. Chelete ena ke M1,230,619.84Millione eo ba hlalolang ba e-s'o e fumane ka lebaka leo ba

hloka bophethahatsi, eseng ho hong ho LHDA.

Sechaba sa Ha Makhalanyane se neng se befile, se bonts'itse ha bahlanka ba LHDA ba ba tsoa fatše ka ho hlahlella bao ba batlang litšebeliso ho bona hore na ka mokotleng ba na le chelete e kae, hobane kampani ea motlakase e neng e loke-la ho ba hokella motlakase e batlile chelete e teng e le joalo ka mokotleng.

Ba re ba hloka malapa a se nang motlakase a hokelloe litjeo li tsoe 'me ho LHDA kamor'a hore bao ba etse lipatlisiso ho LEC, ho lefelloe motho ka bo-mong. Ba boele ba lumellane hore bafallisuo ba bohle ba sebakeng seo ba fumane chelete ea lihloliloeng e kaalo ka M3, 604,218.59, kaha bophelo ba bona bo le thata, 'me e aroleloe malapa a amehileng ka ho lekana.

Mookameli Lefapheng la Phalliso (LHDA) Morake Rakhoba, o supile ba ile ba fumana lengolo la hore malapa a 16 a tikolohong ea Ha Makhalanyane, a fuoe chelete matsohong, ona a tla ikhethela hore na a e sebelisa joang, 'me ea lintlafatso e tla etsa motlakase le Ofisi ea Morena.

Molula-Setulo oa Likomiti tsa Paramente, Mohlomphehi Mokhothu Makhalanyane o kopile hore litletlebo tsa sechaba e be tseo ba sitoang ho li rarolla ka bo bona metseng. A re paramente e na le mosebetsi o mongata oa sechaba oo ba tlamehang ho o etsa, ka lebaka leo lillo tse bang kapel'a likomiti e be tse thatafetseng, kaha ba senyeheloa ke nako e ngata.

Molula-Setulo oa Komiti ea Lihloliloeng Mohlomphehi Moeketsi Motšoane, o re komiti ea habo e lokela ho bona hore lilemo tse nkilong ke sechaba se bokolla ka morero li ea fela.

O re ho bohlokoa hore morero o fuparolle seatla o fe sechaba chelete ea sona, ho qoba lillo tse sa hloka haleng. O re hoa soabisa hore sechaba se teke lillo tsa sona kapel'a komiti ebe ha se lokela ho fumana matšeliso se arohana likola li le ka mahlong.

A re moralo o reng sechaba se se fuoe chelete matsohong o lokela ho hlahlojoa bocha molemong oa ponaletso.



Ba hlahisa APP ea temo

Tšeliso Thakholi

Matsatsing a morao tje-na batho ba bacha ba ikakhetse ka setotsoana khoebong, ka morero oa ho loantša tlaa, le tlhokahalo ea mesebetsi e hloang mekoalaba bacheng. Bacha ba theha likhoebo ka bo-mong esita le ka boikopanyo empa seo boholo ba bacha ba llang ka sona, ke tšehetso ea lichelete, ho holisa le ho matlafatsa likhoebo tsa bona.

Abuti Katiso Kherehloa a ikopantse le bacha ba bang ba bahlano, ba thehile kampani ea pele ea mofuta oa eona, e bitsoang SUS-TECH. Nakong eo a neng a ntse a le Sekolong se Seholo sa Lithuto tsa Matsoho le Mahlale sa Limkokwing, o ile a qala pele ka ho theha kampani ea hae e bitsoang INFO/WEB ka selemo sa 2019, 'me e ntse e etsa



lintho tsa marang-rang.

Ka lebaka la bohlae le litsebo tseo a nang le tsona, kahare ho INFO/WEB o ile a qala se-

thala sa koetliso ea kelello, mahlale le likomporo. O ne a ruta bana ho tloha ka ba lilemo tse tšeletseng ho ea holimo, a ntse a kenyelelitse le batho ba baholo. Ka selemo sa 2020 a boela a theha kampani e 'ngoe e bitsoang GLOBAL TECHN INNOVATION(GTI), eo e itseng hoba a qete lithuto tsa hae tsa Software Engineering Multimedia ba ileng ba ikopanya GTI le SUS-TECH ho e etsa ntho e le 'ngoe.

Har'a tse ling tse ngata tseo SUS-TECH e li etsang ke mofuta e fapakaneng ea li-APP, tseo batho ba ka khahloang hore ba ka li etsetsoa. Ho fihlela hajoale ba se ba entse tse hlano, 'me ea botšelela eo ba sa tsoa e etsa ke ea temo e tliil'o thusa sechaba sa Basotho ho matlafatsa tlhahiso ea temo. APP ena le hoja e-s'o ka e khakola ka molao kaha e sa le ncha, e se e ntse e sebetsa ka makhetha, 'me ba se ba e file lihoai tse ling tsa Setereke sa Maseru le Leribe ho e beha tekong.

Lihoai li bonahala li e thabetse haholo, 'me morero ke hore e tla khakolaa ka molao ha selemo sa Basotho sa temo se thoasa, e leng ka khoeli ea Phato monongoaha. H'a hlalosa mesebetsi oa mantlha oa eona o li beha tjena:

Rona re le bana ba Basotho re ikopantse ka sepheo sa ho ntlafatsa bophelo ba Basotho, e le ho ba thusa ho tloha mekhoeng ea bona ea khale ea temo, ho ba tliša temong e ntlafatseng ea maemo a hajoale a bophelo ka tšebeliso ea

APP ea temo. APP ena ea lihoai ke tsela ea ho ba fa mahlale a temo ka mokhoa oa marang-rang.

Lihoai li ka e sebelisa ho latela hore na ba batla ho e sebelisa ka mokhoa ofe, kaha e sebetsa lintho tse fapakaneng. Mohlala: ha sehoai se il'o lema masimong e tla mo hlalosetsa hore na o lokela ho jala peo e kae, a lokise mobu joang le manyolo a sebelise a makae a mofuta ofe. E boetse e hlalosetsa sehoai le mofuta oa mobu oo a tliil'o jala ho ona. Masimong le majareteng e ntse e tsa mesebetsi o tšoanang.

E boetse e thusa lihoai ho ba kopanya le bareki, ho fumana 'maraka kamor'a kotulo. Basotho ba ka ikopanya ho fumana mahlale ana a temo ka tšebeliso ea marang-rang. Hang ho ba re e thakhole e tla be se e ntse e fumaneha, empa lihoai tse ka ratang ho e fumana ba ka ikopanya le rona re tla ba thusa.

Ho bacha ba heso ba Lesotho, ke ithutile hore ba na le litsebo tse fapakaneng, empa ho haellang ke thahasello. Ha ba qala ba kopana le liqholotso ba se ba nyahlatsa lintho ka pele. Bacha ke le khothaletsa hore le ikopanye ka litsebo tsa lona ka ho fapakana le ithlahisetse mesebetsi. E bang le marello ha le kopana le liqholotso, 'me le sebetse ka thata le tla bona le tla fihlela katleho. E kholo ea ho qetela ke ho ba le lerato la seo le se etsang. Se ke oa qobelloa ho etsa ntho e tliil'o u phelisa e etse ka lerato lohle la hao.

Luti Foods Processors

Lithabaneng, Ha Keiso





"Blend of cayenne pepper garlic turmeric, cinnamon & thyme"



"Blend of red onion red bell pepper & garlic"



"Blend of chilli, corianda & tomato"



"Soul soothing sauce to feed your taste buds"

Contacts:
58855012 Call/ What'sApp

www.moeletsioabasotho.co.ls

Matona a tšepisa pulo ea lifeme



Nthabeleng Seitlheko

Letona la Khoebobu Mohlomphehi Mokhethi Shelile, o re Koporasi ea Ntlafatso ea Moruo (LNDC) le Banka ea Standard Lesotho li thehile selekane se reretsoeng ho khahlametsa batseteli ba lifeme ka mekhoa e bobebe ea ho fumana mekitlane. Tsena li hlaheletse 'mokeng oa bo-ralitaba oa la 8 'Mesa monongoaha.

O re morero o moholo ke ho thusa melata ho nyolla tlhahiso kahar'a naha le ho loantša ho koaloa ha lifeme ho bakelang naha tlhokahalo ea mesebetsi le bofuma. A re papisong le naha tseling tse kang Kenya le Ethiopia khoebo ea lifeme e bonahala e hula ka lithako tsa morao.

Shelile o re lebaka ke hobane Lesotho e sebetsana le ho roka lithepa tse tlang li sehiloe, ha bona e le ho kopanya tseo bareki ba li hlokanang, ha linaheng tse ling ba hlahisa phahlo ho tloha

qalong. A re ba bone ho le bohlokoa hore ba ke ba sebetse ka thata ho batseteli ba bona hore ba hlahise thepa ho tloha qalong ho nyolla moruo.

O re chelete e sebetsoang ka moo ha feela mesebetsi oa Basotho e le ho kopanya masela, ke ho patala basebetsi, motlakase le metsi, e be ho tloha moo khoebo e hula ka thata.

O re ba kene tšebetsong ea ho loantša ho koaloa ha lifeme puisanong le mafapha a mang, 'me tse ling tsa lifeme li se li le mothating oa

ho buloa, ka hoo basebetsi bohle ba be le mamello.

Letona la Khiri le Bosebetsi, Mohlomphehi Tšelis Mokhosi, o re ho bohlokoa hore mafapha ohle a rarolle litaba tsa basebetsi ka lipuisano, kaha ho le molemong oa bohle e seng litaba li sebetsoe ka khalefo. A re beng ba mesebetsi ba lumele lipuisano molemong oa katleho ea tšebetso.

O supile a sa rate ho bona basebetsi ba hlorisoa haholo ba lifeme, hobane ke moo moruo oa naha o kollang teng, kaha ha mesebetsi oa lifeme ha o le sieo Basotho ba bangata ba ba tlokotsing joaloka hona joale, ka hona ho bohlokoa hore bohle ba baballe se teng ka matsohong a bona molemong oa bophelo.

O re lekala la habo le sebetsa ka thata ho bona

hore bahiri bohle lifemeng ba hlomphe melao le Basotho molemong oa khotso, khoebisano le khoebo e bolokehileng.

Ho sa le joalo, puisanong le Mongoli-Kakaretso oa NACTWU, Tšepang Makakole, o bontšitse hore se tla hlakola Basotho meokho ke ha fela ba ka khutlela mesebetsing, lipuo b'a li utloa ba hloka bophethahatsi. A re khoebo e lokela ho sireletsoa ke 'muso eseng nako eohle ha ho ba thata ke hona ba nahanang ho hlaha ka maano.

O re e bang batho ba sa sebetse ka bongata ho tla bakela naha bofuma, mafu le litlolo tsa molao, ka hoo ba lokela ho potlakela tlhahiso ea mesebetsi ho feta eng kapa eng molemong oa bophelo ba Basotho le ho tliša tšepo ho batseteli.



Li hlaola bohlasoa ba chelete

Nthabeleng Seitlheko

Mohlalobi e Moholo oa Libuka tsa 'Muso Mathabo Makenete, o re mesebetsi oa ofisi ea habo ke ho netefatsa hore tšebeliso ea lichelete tsa sechaba e abiloeng paramenteng e sebetsa ho latela meralo ea tsona. Tsena li hlaheletse 'mokeng oa ofisi ea habo le ba nang le seabo, ka la 8 'Mesa monongoaha.

O re lefapha la liofisi tse kopaneng le ea Mohlahlobi oa Libuka tse alositseng lichelete, li etse hloko ho etsa moralo o hlakileng le ho ba le kutloisiso ea mesebetsi oa Mohlahlobi oa Libuka tsa 'Muso, ho fana ka tlaleho e hlakileng ea tšebeliso ea lichelete tsa sechaba.



O re 'moka ona o thusa hore mesebetsi o phethahale ka makhetho le ka nako e lebeletsoeng, kaha bohle ba utloisisa seabo sa bona tšebeliso ea lichelete le methati e lokelang ho lateloa.

O re bahlanka ba tlameha ho ela hloko methati le tselala ea tšebetso ea chelete, ka ho tsamaea ka meralo e hlakileng le litlaleho tse hlokanang pelaelo.

Molaoli e Moholo oa Libuka tsa 'Muso, 'Malehlohon-

lo Mahase, o itse mesebetsi oa lefapha la habo ke ho sebetsana le litlaleho tsa khoeli le khoeli tsa tšebeliso ea lichelete tsa 'muso, ho bona hore e sebelitse hantle le ho ikobeloa molao ke ba amehang. A re moo e bang ha ba etsa joalo ba fetisetsoa ho Mohlahlobi oa Libuka le sepolesa.

A re moo e bang tšenyobile teng ba etsa tšalo morao, ho sheba tsela ea tšebetso 'me ha ho na le tlole ea molao ba nkela bao likhato. A bontš'a ho le bohlokoa ho bahlanka ho bona hore lichelete li sebelisoa moo li loketseng teng le ka nepo etsoe e le tsa Basotho.

A re bahlanka ba tsebe methati eohle e lateloang ha ho etsoa litlaleho tsa libuka hore li tsebe ho ba makhetho.

Maleshoane Lekomola Danzier, eo ebileng karolo 'mokeng ona, o bontšitse hore ba hlokomela bohlokoa ba tšebeliso 'moho e le mafapha ohle a sebetsanang le lichelete tsa sechaba. A re ba ile ba bona hore nakong eo ho neng ho fetoloa makala ba fana ka tlaleho ho Mohlahlobi e Moholo ea Libuka ho qoba har'a tse ling litlaleho tse se nang ponaletso kapa tse tliša lipotso tse ngata.

A re b'a bona hore Mohlahlobi e Moholo oa Libuka, Molaoli oa Libuka le Molaoli oa Likhakan-yo tsa Lichelete ba lokela ho ts'oarana ka matsoho hore mesebetsi o etsoe ka makhetho. A re bahlanka ha ba chorile hantle ba tseba ho fana ka litšebeliso tse tsoileng matsoho molemong oa ponaletso, ka hona o lumela hore ha ho na motho ea ka thabelang ho se sebetse ka tsela e nepahetseng.

2030 re hloka ho keteka tlholo ea lefuba-Majara

Nthabeleng Seitlheko

Lipalo tsa Lefu la Lefuba li bona-hala li phahama, ho e-na le hore li theohe 'me seo se beha naha le bophelo ba Sechaba tlakotsi, ka hoo bohle ba tlameha ho nka boikarabelo ho hlahlobela mafu. Tse-na li hlalositsoe ke Letona la Bophelo, Mohlomphehi Selibe Mochoboroane, puisanong le koranta ka la 9 'Mesa monongoaha.

O re ntho e ka thusang naha ho tsoa maemong ana, ke phano ea litšebeliso tse ntlafetseng, thuto sechabeng, ho hlahloba khafetsa le hore batho ba iphumanang ba e-na le Lefuba ba fumantšoe kalafo. A re bohle ba lokela ho nka boikarabelo ho fetoha letsoho le letona la 'muso polokehong ea bophelo.

O re ho matlafatsa sena, lekala la habo le tsoile letšolo ho fana ka thuto le litšebeliso sechabeng ka mekhahlelo eohle. A re ho molemong oa Basotho ho nka boikarabelo, ho baleha hara tse ling ho imetsa 'muso ka litjeo tse boima tsa mafu a okeloang kantle ho naha empa batho ba ka



qoba seo. O bontšitse ba lokela ho fokotsa lipalo-palo tsa lefu lena hore Naha ea Lesotho ka 2030 e be e se na letho.

Mochoboroane o tsoetsepele, hore lekala le matlafatsa thuto le lits'ebeliso sechabeng, le ho bona hore mafu a totetseng naha joaloka lefuba a fela. O re ho fihlela hona joale lekala la habo le matlafalitse phano ea litšebeliso setsing sa Qoaling Filter Clinic, Mabo-

te le Likotsi 'me lits'ebeliso li fanoa bosiu bohle ho imolla Sepetlele sa Queen Mamohato Memorial.

A re ho na le lingaka tse tla hiroa setsing seo morero e le hore li ise litšebeliso metseng.

Litaba tsena ke ntlafatso ea litaba tse ileng tsa phatlalatsa ke Motlatsi oa Tona-Kholo, Mohlomphehi Nthomeng Majara, ketekelong ea Letsatsi la Lefatše la Lefu la Lefuba, ka la

6 'Mesa monongoaha, moo a khakotseng lithusa-thuto tse tl'o sebelisoa ho potoloha le naha molemong oa ho hlahlella basebelisi lefapheng la bophelo le sechaba ka malebela ho thibela, ho itšireletsa le ho loants'a Lefu la Lefuba ka har'a naha.

Majara o bontšitse e se e le lilemo Naha ea Lesotho e loantša Lefuba empa le sa ee moriting. A re o bohlokoa hore lithusa-thuto

tse tl'o sebelisoa li sebetse haholo moo lekala le khibelang teng, kaha ba hloka hore ka selemo sa 2030 ba be ba keteka tlholo.

O itse hoa nepahala hore naha e ke e tsome ka matla sesosa sa lefu lena ka lebaka lena ba etsa khoelehetso ho batho bohle hore ba nke boikarabelo ba ho hahlobela mafu.

Moemeli oa Mokhatlo oa Lefatše oa Bophelo Lesotho, Dr. Richard Banda, o bontšitse ha tla la bofuma le tlhokahalo ea mesebetsi li lokela ho lokisoa e le lintho tse ka holimo-limo, ho felisoa likhoboso ho ba kulang 'me bohle ba fumane litšebeliso tsa bophelo tse matlafetseng. A re ho bohlokoa hore batho bohle ba fumane litlhare ka tsela e nepahetseng.

E mong oa mahlatsipa a lefu la lefuba, Itumeleng Martin's, o supile hore liqholotso li ngata ho batho ba sebelisang litlhare tsena, joaloka ho ja hantle ho thusa hore litlhare li sebetse ba bile ba li noa ka nepo.

O re ba fumana batho ba sa ba amoheleng kaha ba fetoha matlalo, ka lebaka la litlamorao tsa lipilisi. O re o ne a fokotse 'me ka matsatsi a mang a sitoa ho tsamaea a tlameha ho peptjoa. O re ho bohlokoa hore bacha ba nke khato ka bophelo ba bona molemong oa ho qoba mafu.



Nthabeleng Seitlheko

Section-2 e eletsa 'muso

Mokhatlo oa Section - 2 o kopa 'muso ho nyehlisisa lijo-thollo molemong oa Basotho, kaha boholo ba bona ba tl'oa sitoa ho fihlela litheko tseo, 'me ho tl'oa ba boima ho mafutsana a kojoana li mahetleng. Tsena li boletsoe ke Mongoli-Kakaretso oa Section-2, Rapuseletso Sekabi, ka la 9 'Mesa monongoaha.

O re Mokhatlo oa Le-fats'e oa Lijo (WFP) o bonts'itse 65% ea bana ba Basotho e le tlokotsing ha 25 % e le likhutsana, batho ba phelang le ts'oaetso ea HIV/AIDS, bacha, batho ba nang le bokooa le batho ba phelang ka maloting, 'me sena se tl'oa bakela naha tlala ea boja-likata.

Tlaleho e tsoetsepele hore 49.7% ea Basotho e tobane le tlala, 'me 80% ke ba phelang ka maloting. Tlaleho ea khoeli ea Phato ngoahola eona e supile ha 580,700 ea Basotho e tobane le tlala ea boja-likata 'me palo ena e phahame ho latela tlaleho ea selemo sa 2022.

O itse ho nyoloha ka 7% ha litheko tsa lijo ho



tl'oa siea malapa a mangata a le tlokotsing 'me ho tla lebisa ho sechaba se nang le bokakachelana le phepo e fosahetseng.

O re Basotho ba tobane le mathata a tlhokahalo ea mesebetsi, phetoho ea leholimo 'me batho ha ba fumane mesebetsi ea boemo ba mangolo a bona, ba qetella ba fiela

le hoja re lebeletse hore ke bona ba ka nts'etsang naha ena pele ka litsebo tsa bona.

O re ntho e bohloko ka hore ba ntseng ba sebetsa mesebetsi ea lahleha, likhoebo tsa melata li hatikela tsa Basotho, ka hoo ba ipiletsa ho 'muso ho ela hloko bophelo ba Basotho.

Sekabi o re mokhatlo oa habo o ipiletsa ho 'muso ho tloa matjato ho bona hore o inola Basotho tlaleng ena e bakiloeneng ke maemo a phetoho ea leholimo, khoholeho ea mobu le matsoai a ntla-fetseng mobung sebakeng sa temo.

Ba re ka lebaka la tlokotsi ena hohle moo

'muso o tla nka chelete teng ho ts'ehetsa nyollo ena, Section-2 e tla ema le 'muso.

Ka lehlakoreng le leng mokhatlo o khahlanong le ho rojoa ha molao ke ba boholong ka more-ro oa ho tlatlapa Basotho ka Molula-Setulo oa Mokhatlo ona Kananelo Boloetse, ea huletseng Letona la Matla Prof. Nqosa Mahao, LEWA, LEC le Ramolao oa 'Muso Rapelang Motsie-loa khotla.

Khang ea ke ho re LEWA e file LEC tumello ea ho nyolla litjeo tsa motlakase e se na tlaleho e hlahlobiloeng ea morao-rao ea lichelete, eleng seo mokhatlo o reng se khahlanong le molaoana oa nyollo ea litjeo tsa motlakase oa 2009.

Har'a tse ling tsa likopo tsa Mokhatlo ka khotla ke hore lekhotla le tjebele matjoing qeto eo ea LEWA ea ho lumella LEC ho nyolla litjeo tsa motlakase. Lekhotla le ananetse thapeli ena ea hore nyeoe eo e potlakile, 'me la laela baikarabelli nyeoeng ho kenya lipampiri tsa bona tse arabelang nyeoe eo, ka la 12 'Mesa monongoaha nyeoe e tsebe ho lula.

Flour Mills e khahlametsa Basotho

Tšelisio Thakholi

Mookameli oa Leloala le Lehola la Lesotho (Lesotho Flour Mills), Monghali Fourie du Plessis o phatlalalitse hore ka lebaka la maemo a nyarosang a ho phahama ha litheko tsa poone e tšoeu, leloala le nkile khato ea ho khahlametsa sechaba sa Basotho ka ho theola ho nyoloha ha litheko ka 7%.

Ho ea ka phatlalatsa ena eo a e ntšitseng Maseru, ka la 8 'Mesa monongoaha, o bontšitse hore sesosa ke ho phahama ha litheko tsa poone e tšoeu Naheng

ea Afrika Boroa, e leng eona e ka sehloohong e tsoang kante ho naha. O re theko ea poone e tšoeu ea Afrika Boroa e nyolohile ka 39% nakong ea likhoeli tse peli feela, 'me e hloele ho tloha ho M3,800.00 ka Metric Ton ho tloha ka la 31 Pherekhong monongoaha, ho ea ho M5,300.00 ka Tlhakubele monongoaha.

O re ho phahama hona ho amahanngoa ka kotleloho le litla-morao tsa boemo ba leholimo, ho bakileng komello e mpe le tlhokahalo ea pula likhoe-ling tse peli tse fetileng. A tiisa hore komello e teng e bakile tšenyō e kholo bakeng sa chai, haholo-holo Naheng ea Afrika Boroa, moo tlhahiso ea poone e lebelletsoeng ho

theoha ka 20%. A supa hore litla-morao tsa boemo bona li amme linaha tse ling tsa Afrika tse kang Lesotho le Zimbabwe moo Naha ea Zimbabwe, e hlokang chelete e kaalo ka \$2Billione ho thusa ho felisa koluoa ena ea litheko tsa lijo.

A boela a supa hore leoala le se le nkile mehato ea ho bona hore poone e tsoelapele ho fihlela ho batho bohle. A thetha ka hore o tšepa hore lipula tse seng li qalile ho tšoloha matsatsing ana le libekeng tse tlang, li tliil'oa thusa hore maemo a boele a khutlele setloaeling, e le ho kokobet-sa maemo a litheko tse phahameng ka lebaka la koluoa ea boemo bo hlobaetsang ba leholimo.



Basotho lemang ka se teng

Nthabeleng Seitlheko

Basotho ba tlameha ho sebelisa manyolo a liphoo-fole ho lema masimo ka ona, kaha a etsa lijo tse nang le matsoai a nepahetseng a tlholeho. Tse-na li boletsoe ke Lerotholi Mahamo, setsebi litabeng tsa lipeo le manyolo, puisanong le koranta, ka la 9 'Mesa monongoaha.

O re manyolo a liphoo-fole tsohle a bohlokoa kaha ho khothaletoa temo e baballehileng le e ntlafetseng molemong oa bophelo bo botle. O re manyolo a ntlafalitsoeng a bohlokoa hobane temo ea ona e potlaka kapele, empa seo ha se thuse ka letho hobane ho na le matsoai a haellang lijalong.

A re Basotho ba lokela ho khutlela mekhoeng ea boipheliso ea khale, kaha e ne e le temo e se nang litšenyehelo hobane ba ne ba matlafatsa mobu ka seo ba nang le sona. A re temo ea moiteli oa e matla, kaha o otloa ke letsatsi pele o ka sebelisoa le ho putisoa ho bolaea likokoana-hloko.

O re pele motho a lema serapa kapa masimo ho khothaletoa hore ea nang le litlhaka tsa poone kapa mabele a li fokotse feela a lemelle holima tsona kaha li boloka mongobo, 'me ba tšele manyolo matsatsi a beke masimong pele ba lema.

O re ho bohlokoa hore ha motho a se a lemme lijalo li hlaha a hlahlobe na li phahama joang. A khothaletsa lihoai ho itloaetsa ho hlahloba mobu e le mokhoa o ka thusang hore motho a tsebe hore na mobu oa hae o lokeloa ke sejalo sa mofuta ofe.

O re batho ba ka boela ba ithitella mokeli-keli ka ho kopanya litlama hammoho ho loantša seboko lijalong. O re lijalo tse ling ha li atlehisoe ke tšebeliso ea mekeli-keli e



rekoang, hobane mobu o se o senyehile masimong.

Ha phethela o re Ba-

sotho ba tlohele ho lla manyolo a rekisoang ke 'muso hobane ha na bophelo bo botle, ba khut-

lele mekhoeng ea bona ea temo molemong oa temo e se nang litšenyehelo.

E mong oa lihoai tsa temo ea litapole, Tlaba Mochebelele, o re ke paki e phelang ea temo ea moiteli oa likhomo kaha a sebelisa ona ho lema litapole. O re litapole tsa hae ke tse atlehileng ka ho fetisisa, ha li na seboko kapa mabali.

O bonts'itse li bapala karolo e kholo bophelong ba motho kaha ba sebelisitse moiteli oa tlholeho e seng o entsoeng ka lichefo tse fapakaneng. O re ha Basotho ba ne ba ka khutlela temong ea moiteli ba ne ba se na ho imeloa ke litjeo tsa temo, e ne e tla ba nolofalla kaha ba tla be ba sebelisa seo ba se khonang.

A bontša batho ba bangata ba e-na le mohopolo oa hore temo e ka ntlafatsoa ka manyolo a tsoaki-loeng, empa ho bohlokoa e le ho tseba hore na masimo a lumeloa ke temo efe, ka ho hlahloba mobu. O ipilelitse ho Basotho ho kena temong e se nang litšenyehelo molemong oa hore ba tsebe ho lema, 'me ba phelise malapa.

20-04-2024

MC: Mosa Mokoena

Maria Mabaso
Coordinator

Host: Makatleho Letseka

Bishop Dr Pual L. Matete

Pastor: Hennie Hanekom
Amahoro Africa Guest Speaker

Basali eeeeeeeeeee!!

Free Entry

Host: Matanki Ntepile

For More Infor +27731483292

For more information contact: +266 590 31 798 / 620 02 829

amaHORO VISION

www.moeletsoabasotho.co.ls



MOB KIDDS


EDUTAINMENT

Puzzle MOB 92-4528

It's SNOW-ing!

This puzzle contains 22 words that begin with "snow-." Find the words, then write them at the bottom of the page.

C	S	S	S	N	O	W	M	O	B	I	L	E	E	M	S
Y	I	N	N	L	P	L	N	L	X	E	S	S	N	S	N
S	M	S	O	O	Y	Y	L	M	U	E	N	W	S	N	O
N	R	Z	N	W	W	A	O	S	K	R	O	S	N	O	W
O	X	S	O	O	B	S	E	A	J	G	W	N	O	W	M
W	V	N	N	W	W	R	L	G	X	E	B	O	W	D	A
S	S	H	O	O	I	F	E	I	P	Y	L	W	P	R	K
U	J	N	G	T	W	N	A	A	D	K	O	I	L	I	E
I	S	S	W	O	A	S	C	L	K	E	W	N	O	F	R
T	N	O	N	M	P	S	T	L	L	H	E	G	W	T	B
R	N	S	W	Y	W	Q	L	O	E	H	R	N	K	G	U
S	P	O	S	O	Y	O	W	Y	R	E	W	K	K	L	L
Q	N	S	N	O	W	L	E	S	S	M	T	Z	S	U	B
S	P	S	K	S	N	O	W	S	H	O	E	S	Z	N	C
S	N	O	W	E	D	S	N	O	W	B	O	A	R	D	Z
L	W	D	O	S	N	O	W	A	N	G	E	L	W	N	X





www.moeletsioabasotho.co.ls

DID YOU KNOW?



Caterpillars have an astonishing 4,000 muscles, a significant contrast to the human body's roughly 650 to 840 skeletal muscles, depending on counting methods. Their extensive muscle count, including 248 muscles solely in their head, is necessary for tasks like elongating their torso and facilitating movement by pushing blood from rear to front segments.





TSA KEREKE

Regina Mundi e amohela moprista

Tšeliso Thakholi

Sontaha sa la 7 'Mesa monongoaha e leng sa Mokete oa Mohau oa Morena, e bile sa thabo e kholo Parishing ea Maria Mofumahali oa Lefatše, Mazenod, ha ho ne ho amohelea Moprista e mocha Fr. Justinus Khahliso Moloi OMI ea tlotselisoeng Boprista bo Halalelang 'mishoneng oa Emmause, Ha

'Missa se neng se eteletsoe pele ke Fr. Justinus Moloi OMI a tlatsitsoe ke baprista ba bahlano. Har'a baprista bao ho bile teng monga 'mishone oa Emmause Fr. Paul Matlosa OMI.

H'a fana ka khotatso Fr. Francis Malitsi OMI o itse nakong ena ea Mohau oa Morena, re ikhopotsa me-hauhelo ea Morena le lintho tsohle tseo Morena Molimo a re etselitseng tsona.

"Ka hona re leboha Morena Molimo re re o re hauhe-tse ho fihlela letsatsing lena

mocha, Fr. Mahlomola Alex-is Heisi o qalile pele ka ho leboha phutheho ea liparish tse na tse peli tseo e saleng li tšehelitse Fr. Moloi ka mekhoha e fapakaneng. A re ba motlotlo haholo ka eena, kaha ba mo file letsoho kahare, 'me o tliil'o sebetsa ka boitelo le bokhabane bo boholo. "Ntate Moloi re re o sebelitse ha re lithong ka uena. Kena kahar'a mosebetsi ntate 'me moo e bang o kopana le liqholotso tsa mosebetsi, re ntse re le teng ho u thusa." Ke Fr. Heisi eo.



Makhakhe ka la 10 Hlakola monongoaha, ea neng a felehelitsoe ke batsoali ba hae, lelapa la habo, phutheho ea bakriste ba Emmause le baprista bao e sa leng ba mo tataisa thomong ea hae.

Mokete o ile oa qala ka Sehlabelo se Halalelang sa

la kajeno." O boletse hore Morena Molimo kamora hore a romele Mor'a hae lefatšeng, o se a fetoha Molimo ea mohau, ea lereko le ho lieha ho halefa e leng sona seo a itseng rea se ketela.

H'a bua lebitsong la Mishone oa Emmause a bile a nehelana ka Moprista e

Mong'a mokete Fr. Moloi o lebohile bohle ba mo thusiseng ho fihlela mokhahlelo oa boprista, haholo batsoali ba hae, baprista bao e saleng ba mo tataisa mekhahlelong e fapakaneng le sechaba sohle sa bakriste seo a ithutileng tse ngata ho tsoa ho sona le sona se ithutile tsa bohlokoa ho eena. A ipiletsa ho bona ho tsoelapele ho ba tšehetsa ka lithapelo kaha ba seo ba leng sona ka lebaka la lithapelo tsa bona.

H'a amohela moprista e mocha Fr. Patrick Khoaele OMI o boletse ha ba amohela Fr. Moloi eo ba sebelitseng le eena ka mofuthu pele eba moprista. A ipiletsa ho eena ho phutholoha le ho etsa mosebetsi oa hae ka bolokolohi, haholo-holo litalenta tseo e bang o na le tsona molemong oa ho holisa Kereke ea Morena Molimo.



2023-2024 SELEMO B

Sontaha sa 3 sa Paseka

Liketso 3,13-15.17-19

Pesalema 4

1 Johannes 2,1-5

Luka 24,35-48

Khotatso



Molemong oa tšoarelo ea libe

Bana beso lipalo tsa kajeno li hooa 'moho hore Morena Jesu Kriste o ile a feta tlasa mahloko ohle ka lebaka la tšoarelo ea libe.

Ha le etsa boinahano ba sehlabelo sa Morena lebakeng la libe tsa lona, le nke Mohalaleli Maximilian Kolbe e le mohlala. O entsoe mohalaleli ka selemo sa 1982, a hlhela Naheng ea Poland ka selemo sa 1894. H'a le lilemong tsa ho arabela pitso ea Morena a inehela kopanong ea Francis, eaba ka selemo sa 1927 o theha ntlo ho thusa ba ratang ho inehela bophelong ba boitlami.

Ka selemo sa 1941 joaloka mookameli oa ntlo o ile a tšoaroa ke Gestapo 'me a akhelo a chankaneng Auschwitz. Kamor'a libeke tse peli a kene chankaneng motšoarua oa thoba, 'me ho ea ka tloaelo kamor'a ketsahalo ena ho no khethoa banna ba babeli ka lotho ho shoa ka lebaka la ho se je. Ho no le teng monna e monyenyanane lilemong hara banna ba khethiloeng, eaba Fr. Maximilian o kopa ho nka sebaka sa hae. Kopo ea hae ea lumelloa 'me ka la 14 Phato 1941 o ile a hloka hla ka lebaka la tla.

Mona le bona lerato le hlolang la bokriste moo motho a fanang ka bophelo ba hae ho monna e monyenyanane ka letsatsi la hae la kahlolo. Ho Kriste ha ho joalo, ha emele hore ho fihle letsatsi la kahlolo hore re shoe ka lebaka la sebe sa tlhaho kapa tseo re li entseng. O iketsa sehlabelo le pele bohle ba ka hlaha, 'me le hlaha kapel'a Morena le e-na le Kriste joaloka 'Muelli oa lona. O tla fana ka bopaki hore ea neng a se na sebe o ile hlatsoa libe tsa rona ka mali a hae joaloka Konyan'a Molimo.

Kriste o shoetse libe tsa bohle, ka hona le na le tokoloho ea ho amohela sehlabelo sena kapa ho lahla grasias ena ea Morena Molimo. Haeba le amohela sehlabelo sena le lokela ho soabela libe tsa lona 'me le li furalle le boele hape le mamele le ho latela Melao ea Molimo e fumanehang Mangolong a Halalelang le lithutong tsa Kereke e Halalelang e Katholike.

Bohle ba mametseng melao ea Morena joaloka Fr. Maximilian ba tseba Morena Molimo, 'me lerato la hae ka ho bona le fihletse phetheho. Ka mamelo ea Melao ea Morena leratong la Morena Jesu le tseba hore Kriste o ka ho lona le lona le ka ho Eena.

Nakong eo Kriste a neng a ithahisa ho barutua ba hae 'me a ba laela ho phatlalatsa tšoarelo ea libe lichabeng tsohle ho qala Jerusalema, ba ile ba makala le ho tšoha ka khopolo ea hore ba bona sepoko. Empa ho ne ho se joalo ba ne ba e-na le Kriste ea tlotlisitsoeng. Morena Jesu o ile a joetsa barutua ba hae hore sepoko ha se na 'mele le masapo ao a nang, hape ha se je lijo joalokaha a ile a ja mahlong a bona. Sena se pakahatsa hore boteng ba Kriste ha se boteng ba moea oa hae feela.

Morena Jesu ka tsela e tšoanang le rona o re file taelo ea ho phatlalatsa tšokoloho le tšoarelo ea libe lefatšeng. Pitso ena e ka atleha feela ka thuso ea grasias ea Molimo Ntate le ka matla a Moea o Halalelang. Ka hona ha re ntse re rapela 'me re inahana ka Mangolo a Halalelang re hopoleng kamehla hore Morena Jesu Kriste o ile a feta tlasa mahloko ka lebaka la tšoarelo ea libe tsa rona. Ha re kopeng Moea oa Krsite ho re ruta ho bona le ho amohela sehlabelo sa Kriste, se bontšang lerato leo a nang le lona ho e mong le e mong oa rona.

Bahalaleli har'a Beke

- 15 'Mesa Paternus
- 16 'Mesa Bernadette
- 17 'Mesa Anicetus
- 18 'Mesa Agia
- 19 'Mesa Emma
- 20 'Mesa Marian



Tšelisothakholi

Lihlopha tsa papali ea litebele ho hlaha ka likanta tsohle tsa naha, li ile tsa kopana 'moho Holong ea Sekolo se Seholo sa Sechaba(NUL), Roma, ka la 6 'Mesa monongoaha ho qala boikoetliso ba tsona ka mokhoa oa litlholisano, e le ho itlhophele lipapali tsa Mohope oa Mandela Cup o tliilo tsoareloa Durban, Afrika Boroa, ka la 14 ho isa la 21 Motšeanong monongoaha.

Phala ea Mokhatlo oa Lesotho oa Papali ea Lite-

Ba litebele ba nkhisetsana mahafi

bele(LeBA), Monghali Letšasa Taole, o hlalosa ha lihlopha tse na e le lekhetlo la bobeli li khobokana 'moho ho tsoara litlholisano ka mokhoa oa boithlhopho, 'me li buletsoe libapali tsa mekhahlelo eohle le basali. A re boithlhopho bona bo boetse bo tliilo thusa botsamaisi ba papali ea litebele ho hloaea sehlopha se tlang ho bopa mokhethoa oa naha.

Taole a supa hore litlholisano ke ntho e kholo haholo ho sebakali sa papali ea litebele kaha ke hona moo bakoetlisi ba beileng



leihlo, nakong eo ba seng ba bopa mokhethoa oa naha. "O qalile ho sheba libapali tse ipabolang koano, ebe ka nako eo ho seng ho etsoa mokhethoa re se re nka ba ipabotseng, kamor'a litlholisano tse tharo ebe re se re nka sebakali se joalo e le eena mohloli boimeng bo fapakaneng." Ke eena eo.

A re ntho e ba thabisitseng haholo ke ho bona lipalo tsa baroetsana li ntse li nyoloha letsatsi ka leng, kaha hajoale sehlopha ka seng, se na le baroetsana ba sa feteng bohloko ka palo. A re baroetsana ba loanneng litlholisanong tse na ke lihlopha tse tharo. A ipiletsa ho basali ho tla ka bongata papaling ena kaha e ntse e tsoana le lipapali tse ling.

A re papali ea litebele e na le melao le melaoana e e tsamaisang, 'me e fana ka bophelo bo botle, e ruta batho boitsoaro e le hore ba tle ba tsebe ho hola e le batho ba bohlokoa.

Ka holimo ho tsohle ke papali eo batho ba ka e sebelisang ho itšireletsa khahlanong le lira, haholo-holo ha ba hlasetsoe libakeng tse fapakaneng.

Sebakali sa sehlopha sa NUL, Neo Moshesha o thoholelitse bohlophisi ka litlholisano tse na, kaha li tlii'oa ba thusa haholo ho ipekha sekaleng. A re sehlopheng sa habo boitokiso e bile bo matla, 'me a tšepisa hore ba tlii'oa itsamaela bolacha mekhahlelong eo ba tlii'oa bapala ho eona.

Tšelisothakholi

'Mino oa gospel hip-hop o bonahala o ntse o hola ka tsela e potlakileng, hoo o ka qetellang o isitse libini tse ngata makhulong a matala. Libini tsa 'mino ona li ntse li eketseha ka palo e holimo kahar'a naha, 'me boholo ba tsona bo se bo qalile ho iphelisa ka ona, ho latela maemo a teng a theko ea ona selikalikoeneng sa 'mino.

Puisanong le Tumelo Seliane 'T-Born' oa Morija tikolohong ea Makhoarane ea sa tsoa ntša letlapa la hae le lecha, mathoasong a khoeli ea Tlhakubele monongoaha, o re letlapa la hae le bitsoang Passion le se le ntse le fumaneha mabenkeleng a 'mino, 'me le tšetse lipina tse 12. Har'a lipina tsa hae tse ratoang haholo, o etsa mohlala ka ho qolla tse tharo feela e leng e bitsoang 'Tribute to the loved ones,' e leng e entseng nalane ea bophelo ba hae, kamora ho hlokaalloa ke batsoali ba hae a sa la a inotši.

T-Born o ntša le lecha



O tsoelapele hore pineng ea hae ea bobeli, ke moo a fanang

ka mamello le boitšepo ho batho ha ba kopana le liqholotso

bophelong ba bona ba letsatsi ka leng. Athe pina ea ho qetela

e kholo kahar'a letlapa lena la hae, o re ke e bitsoang 'Mamello'. O re molaetsa oa eona o moholo, ke ho tiisa sechaba 'moko ka hore ha ho e-na le lintho tse itseng, tseo ba sa atleheng ho tsona ba se ke ba nyahama lipelo ba tsebe hore ha lemati le leng la bophelo le koaleha ho tla buleha le leng.

A tiisa hore letlapa lena ke la pele la mofuta oa lona la 'mino oa gospel hip hop, 'me ha ho na le leng le tsoanang le lona ka monate le kileng la etsoa ke sebini sefe kapa sefe kahar'a Naha ea Lesotho. Letlapeng lena o bontšitse a sebelitse le libini tse ngata haholo tsa kahare le kantle ho naha.

Nalane ea katleho ea hae ea ho etsa matlapa a 'mino, e qalile ka selemo sa 2017, moo a ileng a hatisa letlapa la hae la pele, 'me o se a e-na le a mararo ho fihlela hajoale. T-Born ke e mong oa libini tse hloahloa tsa 'mino ea neng a hape khau ea Lesotho Music Awards ka selemo sa 2022.

Roma boys e rathoa ke selepe



Athe papaling ea ho qetela, ba e bapetse ba sa fel-la. "E ileng ea re khathatsa matla le ho feta re le bakoetlisi ke ha sebakali se ea papaling se se na lieta. Ka 'nete re ne re se re kopana le liqholotso tse kholo." A ri-alo. A re ba soabile haholo hore ebe ba qetsetse papali ea bona ka ho hloloa ka tse-la e bohloko ha kaalo, empa a tiisa hore ba theohela tlaase Mokhahlelong oa B Division, ba sa il'o boela ba nka matla, 'me ba ntse ba tliil'o khutla.

Ho sa le joalo, lipapali tse ling tsa ho qetela tse bapetseng ke moo Kick4Life e bapetseng ka seahlolo sa 1-1 le Mzamane e seng e ntse e kene ho Premier, Lerotholi ea ikutloisa mon-ate ka ho pola Galaxy 4-0, ha Quthing LMPS e hlotse Swallows 3-0 le hoja e at-lehile ho ba kahar'a tse 'ne tse ka holimo lokong, 'me e tliil'o bapala Mohope oa Top 4.

Tšeliso Thakholi

Lipapali tsa Liki ea A Division tsa tikoloho e ka Boroa le ka Leboea, tsa selemo sa lipapali sa 2023/2024 li fihlile sehlohlolong mafelong a fetileng a beke, moo Sehlopha sa Bolo ea Maoto sa Roma Boys se rathiloeng ke selepe kamor'a ho poloa ke Majantja ka phafa ea 6-0, Lebaleng la Swallows, Mazenod, ka la 6 'Mesa Monongoaha.

Roma Boys e rathiloe ke selepe hobane e le ea ho qetela lokong ea A Division e ka Boroa, ha ka Leboea ho tsoile Galaxy. Roma Boys e phethetse lipapali tsa eona tse peli tsa ho qetela ka ho hloloa ke Qoaling Highlanders ka 3-0, ha Majantja e tetekile 6-0.

Puisanong le mokoetlisi oa Roma Boys, Monghali Teboho Posa o itse ba entse sohle se matleng a bona e le ba lefapha la bakoetlisi, ho leka ho pholosa Roma Boys hore e se ke ea theohela mo khahlelong o katlaase oa B Division, empa ntoa e ba hlotse. O hlalositse hore o qalile ho koetlisa Roma Boys mokhahlelong oa bobeli oa lipapali tsa Liki, e le h'a se a hlokometse hore sehlopha ha se sa bapala hantle.

A re ba ne ba e-na le monyetla oa ho pholoha selepe, hoja ba ile ba atleha ho hapa lipapali tsa bona tse peli tse setseng, e

leng tsa Majantja le Qoaling Highlanders. A re bothata bo boholo bo ile ba qaleha ha ba qeta ho lahlehela ke lipapali tseo tse peli, moo

ho bonahetseng kamor'a hore ba hloloa ke Qoaling Highlanders, libapali li se li sa tle boikoetlisong ka tsel'a e nepahetseng.

Mare e paqamisa Mehalalitoe

Tšeliso Thakholi

Sehlopha sa Naha ea Lesotho sa Bolo ea Maoto ea Basali, Mehalalitoe se paqamisitsoe ke sa Mare ea Botswana, ka phafa ea 2-1, papaling ea bona ea machaba ea setsoalle tlasa mokoetlisi e mocha, Monghali Shalane Lehohla. Papali ena e ne e bapalloa Lebaleng la Royal Aria, Botswana, ka la 6 'Mesa Monongoaha.

Papali ena ea setsoalle e bile bohlokoa haholo kaha e ne e reretsoe ho thusa mokoetlisi e mocha 'moho le moifo oa hae, ho hlahloba sehlopha e le ho itokisetisa ho tla bapala lipapali tsa COSAFA Women's Championships tse tlang ho tsoareloa Naheng ea Afrika Boroa Motšeanong selemong sena. Mokhahlelong oa pele oa papali mokoetlisi Lehohla, o ile a kenya sehlopha sa pele se ileng sa bapala ka matla, empa a se fetola papaling ea bobeli ho fa libapali kaofela monyetla oa ho bapala.

Papali ka kakaretso, Mare e ile ea fenেকেtsa Mehalalitoe likobo molaleng ho tloha karolong ea pele ea papali. Ke moo e ileng ea atleha ho hlaba lintlha tse peli ho e le 'ngoe, 'me eaba ho felile ke lehlohonolo. Ena e ne e le papali ea pele ea machaba ea setsoalle eo sehlopha sa Mehalalitoe se e bapalang, nakong ena ea beke ea FIFA. Ha sehlopha sa Mare sona se bapetse lipapali tse 'maloa pele se kopana le sa Mehalalitoe, moo se atlehileng ho hlola lipapali tse 'ne, sa bapala ka

ho lekana ho e le 'ngoe le ho lahlehela ke tse peli.

Sehlopha sa Mare ho boetse ho hlokomelehile hore ha ho na nako eo se kileng sa khafutsa lipapaling, ho latela tsela eo se neng se bapala le sa Mehalalitoe ka eona.

Ho ea ka ba bang ba bakoetlisi ba lihlopha tsa Liki ea Basali ea Lesotho, Mehalalitoe ha e lokele ho phomola e tsoanela hore e fumane monyetla e mengata ea boithophisetso ba lipapali tsa eona tsa machaba. Ba re e tsoanela ho

bapala le lihlopha tse ngata pele e bapala lipapali tsa Mohope oa COSAFA. Ba re ho latela boemo bo teng ba papali ea bolo ea basali kahar'a naha, sehlopha se bapetse hantle haholo papising le linaha tse ling, kaha Liki ea bona e ntse e hola, 'me ba na le tšepo ea hore nakong e tlang ha feela ba ntse ba fumana lipapali tsa setsoalle tsa machaba tse ngata, ba tla sebetsa hantle ho feta. Ba qetella ka hore lipapali tseona tseo ba seng ba li bapetse ke seipone ho bakoetlisi ba bacha, hore na ba lokela ho lokisa ho kae e le ho matlafatsa sehlopha.



Nthabeleng Seitlheko

Bahoebi ba ithophela 'moka

Basotho Medical Herbs e tl'o tšo-ara 'moka, ho fana ka thuto ka lihlahisoa tsa matekoane tse ka bang molemong oa kholiso ea moruo le bophelo bo botle. Tse-na li boletsoe ke Adv. Motseki Letsota, pui-sanong le koranta ka la 5 'Mesa monongoaha.

O re Basotho Medical Herbs ke Basotho ba ikopantseng ba ileng ba bona ho e-na le sekheo lipakeng tsa Lekala la Bophelo le sechaba, ho fana ka tsebo litabeng tse, ka hona khoebo ena e ngolisitsoe ka molao le lekala. O hlalosa hore ka selemo sa 2016 Lesotho ke naha ea pele e ileng ea lumelloa ho lema matekoane, hobane 90% ea ona e sebelisoa ho alafa mafu.

Letsota o itse ba tl'o ba le 'moka moo lihoai tsa matekoane li tlil'o bapatsa lihlahisoa tsa tsona, hape litsebi ho hlaha kahare le ka ntle ho naha li tla fana ka thuto. O re ba rerile ho keteka let-

satsi la lefatše la matekoane ka la 20 'Mesa, 'me sena ba rera ho se etsa selemo le selemo ka mekhoha ea tlhokomeliso le thuto.

O re ba lebeletse batho ka mekhahlelo ea bona ka ho fapakana, e ka ba bae-tapele ba sechaba kapa litsebi, 'moho le motho e mong le e mong ea lilemo li kaholimo ho 19 'me bohle ba tsebe hore ha ba tl'o tsuba matekoane.

O itse ho tloha selemong seo ba ikopantseng ka sona, ba ile ba fuoa sebaka, sa hlahlojoa, 'me ba fumana tokomane e ba lumellang ho se sebelisa e le sa khoebo. O re eaba kamor'a moo ba etsa pokello hofihlela ba bokella M550,000.00 ba bile ba fumana le batseteli.

O re ba ile ba tobana le qholotso ea 'maraka kaha Basotho ba sa tsebe molemo oa matekoane, ka hona ba rerile ho tla etsa mokete moo ba tl'o mema sechaba ho se ruta ka litsela tse fapakaneng tsa tšebeliso ea matekoane.

Mookameli oa Basotho Medical Herbs, Matla-a-Morena-Lethunya, o



supile ha lihlahisoa tse hlahang tlhotlong ea matekoane li thusa ho phekola mofetše, khatello ea maikutlo, mafu a letlalo 'moho le litlolo tse folisang ka potlako ho feta tsa lihlahisoa tse ling.

O re kaha matekoane ke ntho e ka bang kotsi ho hloka hore bohle ba

kenang khoebong ea ona ba etse joalo ka molao, 'me khoebo ena e ka thusa haholo kholisong ea moruo oa naha.

A bontša hore 'mokeng oo oa bona ba tl'o bua le bahoebi mabapi le likatleho le liqholotso haholo tse amanang temo, kaha ka

lebaka la boemo ba phetoho ea leholimo ho se bonolo ho lema. A re ba tla boela ba ba thusa ho hohela bo-ramatsete le ho hlahisa mesebetsi.

A tsoelapele hore ba tl'o ruta sechaba ka tšebeliso e ntle ea lithetefatsi mol-emong oa bophelo bo botle, kaha ho tla ba le batho ba rekisang ka molao, baruti le bahlabolli. O itse lefatše le tobane le tšebeliso e mpe ea matekoane, empa ha se tharollo ho a fothola kaha a e-na le melemo e mengata haholo e ka thusang sechaba 'moho le naha ho ikhaha le ntšetsopeleng.

A ipiletsa ho Basotho ho sebetsa litaba tsohle ka molao e le ho baleha hore matekoane a tsejoe e le ntho e mpe. O itse ba bang ba bahoebi ba ile ba nyahlatsa khoebo ena ka lebaka la khaello ea bo-ramatsete.

O re holima melemo e seng e boletsoe ba ka boela ba atleha ho hlahisa lijo-tlatsetso, pampiri le mafura ka lithupa le makhasi a sallang ha ho kotuloa matekoane. A re 'muso o se ke oa fotholisa Basotho matekoane, empa o ba thuse ho theha likhoebo molemong oa ho hlola qholotso e teng ea tlhahiso ea mesebetsi.

A re tšebeliso e mpe ea matekoane e kotsi ka hona bohle ba lemanang ka thoko ho molao, ba khoe mekhoheng ho sireletsa sechaba haholo bacha bao e leng bokamoso ba naha. A ipiletsa ho bona bacha ho tlohela ho tsuba matekoane hobane a thunthetsa palesa ea bocha ba bona.

TSE NTLI LITJOTJELA PRESENTS

WELCOME WINTER Festival

DATE : 04-05 2024

VENUE : QEME KA MAFIKENG

10:00AM TILL LATE COOLER BOX M50

MC : PARTY ENZYME TSEKOA & EMKAY LS

**LINEUP : TRUFFLE LS X LOYAL KING X BLUE FLAME
DJ THANDOGG (BOKAMO FM) X NTOABATHONG X TEEFIRE
WALTER NKOPANE (BOKAMOSO FM) X NCHEME GPMG X BLACK FOX
TASHA MAKHETHA (BOKAMOSO FM) X MAKHUBELU X MOSOLA
YOUNG WILLY X MALEHLOHONOLO MPHOU X STAAF REH**

TICKET R30

R40 AT THE GATE